

# Silat kebatinan bukan untuk cabar mencabar

14 APR 1979

Pencak silat

PADA Ahad 25.3.79 saya bersama beberapa orang kawan ada menyaksikan satu persembahan Silat Kebatinan yang dipimpin oleh seorang pendekar yang terkenal di sini di Expo Woodlands.

Persembahan itu, seperti yang biasa kita lihat adalah menarik. Tetapi yang mendukacitakan saya ialah terjadinya peristiwa yang menyedihkan dan memalukan peinta senisilat kerana sedang pertunjukan berjalan, penonton telah dicabar dari atas pentas oleh ketua senisilat itu supaya naik ke atas, kalau mereka tidak percaya.

Maka naiklah seorang

pemuda lalu berlakulah pertarungan antara keduanya. Pertarungan ini patutnya hanyalah sebagai pertunjukan. Tetapi dengan kehendak Allah yang Maha Kuasa, tiba-tiba ketua kumpulan tumbang dibuat oleh pemuda yang naik tadi hingga tempat itu menjadi heboh.

Inilah kejadian yang tidak diinginkan yang telah berlaku. Saya harap pada masa hadapan, jika kita mengadakan pertunjukan seni seperti itu di mana-mana dan pada bila-bila pun masa akan datang, elakkanlah dari terjadi cabar-mencabar.

Perbuatan itu samalah dengan menunjukkan takbur dan riak, perbuatan yang mesti dijauhi kalau kita hendak menunjukkan senisilat secara yang sempurna dan penuh hormat.

Ahli Silat Kebatinan  
Marsiling Drive

# Buku sejarah seni silat hampir siap

15 APR 1979

Pencak Silat

Berita Minggu

BUKU mengenai sejarah seni silat serantau kini sedang dalam peringkat pertengahan penyelenggaraannya oleh Persekutuan Seni Silat Singapura (Persisi).

Walaupun pada mulanya ia dijadualkan diterbitkan pada tahun ini, tetapi usaha-usaha untuk mengumpulkan bahan-bahan yang diperlukan baginya yang mengambil masa agak panjang, hanya membolehkan buku itu diterbitkan pada tahun depan.

"Sekarang ini, kami sedang dalam peringkat mengumpulkan bahan-bahan yang diperlu untuk

pembukaan seni silat itu," kata Encik Johari Uriff, setiausaha Persisi.

## Cari bahan

Dia menjelaskan bahawa setakat ini pihaknya telah dapat mengumpulkan bahan-bahan mengenai sejarah silat tetapi masih memerlukan banyak lagi bahan yang lain untuk pemuatannya.

Usaha ini telah dimulakan semenjak tahun lalu dan persekutuan itu telah menghantarkan beberapa rombongan ke Malaysia untuk mencari bahan-bahan yang diperlukan untuknya.

"Tetapi bahan-bahan yang kami telah kumpulkan didapati masih belum mencukupi untuk menghasilkan sebuah buku mengenai seni silat itu," katanya.

Persekutuan itu berniat untuk menjadikan buku tersebut sebagai salah satu bahan bacaan untuk panduan semua pencinta silat dan diharapkan ia akan dapat memberikan keterangan-keterangan yang lengkap mengenai seni silat.

Selain dari mengandungi adat istiadat silat dan sejarahnya, ia juga akan mengandungi sukatan pelajaran untuk para guru silat.